



Vun frieher un heit for Bensmer Leit
Bergsträßer Anzeigebblatt 25.11.1949



Doichenanner



„Wann ich däs all lääse soll, wärrich ganz doichenanner!“, hot de Franz zu soiner Fraa gesoat, wiesem de Froagebooge vum Finanzamt vun wäje dem Laschdeausgleich uffde Disch gelegt hot. — „Doo bin ich awwer in en Doichenanner noikumme!“ hot die Lisbeth ehre Leit vezählt, wiese vun ehre Besuch bei ehrer Schweejern reduur kumme is. — „In dem Doichenanner kennt sich kaan Mensch mäih aus!“, hot de oalde Hins gedenkt, wie er die bolidische Adiggel vun drei Zeidunge hinnenanner geläase gehadde hot. — „Babbelt doch net sou doichenanner!“, hot de Vorschand vum Laschdauweveoin in de Saal geruufe, wies en Dischbudd unner de Mitglierer gäwwe hot. — „Där bringt noch die ganz Wält in Doischenanner!“, hot doo aaner gemaant, wie er soueme Allewältskrischer mäih Beoachdung geschenkt hot, wie där iwwerhaupt wärt woar.

Es Wärtche „Doichenanner“ schoint demnoch in veel Lääwenslaage noi ze basse. Froagt Eich mool sälschd: Seid Ehr net schunn oft vor laurer Doichenanner net schunn ganz doichenanner worn?

Meer is däs ärschd gäschdern wirrer bassiert, wie ich for heit en Adiggel schreiw wollt. Bei uns woar nehlich alles in aam Doichenanner, weil moi Fraa groad Hausbutz gehadde hot. „Sou, jertz muschde awwer doo wäk“, hots gehaaße, „hock dich driwwe uff den Schduhl, weil ich doo groad schrubbe will!“ — „Ja, den Disdi muschde jertz frei mache, den Platz brauch ich for die Gloasglock vunde Uhr un die annern Sache, die wuu uffem Kommoodche leihe, sunchd kann ich joo's Kommoodche net obschdaawe.“ — „Hock dich doch ande Ouwe, doo am Fenschder kann ich dich net brauche. Ich will doch noch die frisch gewäschene Vorheng noch vorm Dunkelwärm uffhenke!“ — Veschreck net, wann ich jertz de Disch houchhäib. Baß uff, dasses Dindefaß net umfellt!“

Sou ehlich isses de ganze Middoa gange. Awwer mer därf sich net aus de Ruh bringe losse un muß sich jeerer Loag oubasse kenne. Sou häwwichs aa däs mool gehoolte un häbbs uffgäwwe, en zammehengende Adiggel ze schreiw, weil in moiner gäjewärtige Sidudation doch nix Gescheires debei rausgeschbrunge weer. Doodefoor häwwich zwische dem Doichenanner e poar klaane Schbäiß hiegeschrewwen un zwoar ganz doichenanner, wiese mer groad oigefalle sinn.

Es woar mool en Boijemoaschder. Där hot jeerem, wuu zuem kumme is, Räächd gäwwe. Er hot sich gesoat: ärschdens bin ich die Leit dann ball lous un zwaddens kann sich dann kaans iwwer mich beschweern. Doo is mool de Hannes zuem kumme un hot sich driwwer bekloagt, daß de Chrischdoph es Gebisch uff dem Raa zwische soim un moim Grundschild oabgebrennt hett. „Däs Gebisch woar moi Aijedum“, horrer gesoat, häwwich do net Räächd, daß ich mer däs net gefalle loß un den uff Schoareersatz vekloage duu?“ — „Du hoschd ganz Räächd, Hannes“, hot de Boijemoaschder gesoat, un de Hannes is befriedigt zor Deer naus. Kurz druff is de Chrischdoph roikumme. „Boijemoaschder, de Hannes will mich vekloage, weil ich die Hecke uff dem Raa zwische soim un moim Acker oabgebrennt häbb. Wißder aa warum? Die hot mer faschd net mäih gesähe vor laurer Rauwenäschder. Ich froag Eich nor

däs aane: häwwisch doo Räächd gehadde orrer net?“ — „Doo hoschde ganz Räächd gehadde, Chrischdoph“, hot de Boijemoaschder gesoat und de Chrischdoph is schdolz zor Deer naus. „Boijemoaschder“, hot doo de Bolezeidiener gesoat, „däs gäiht awwer net. Aerschd häbbder dem aane Räächd gäwwe un glei druff dem annern. Däs is doch nix gemoacht, veschdanne!“ — „Awwel hoschd du Räächd“, woar die Antwort vun dem friedliewende Dorfowwerhaabt.“

Em Baschdian soi Fraa hot immer geschennt wie en Rouhrschbatz, wann ehrn Mann net haam kumme is, wanns Zeit woar. Doodriwwer brauch mer sich joo net weirer zu vewunnern. Die Weibslait Sinn gezählt, die wuu doo net aus der Roll falle dunn unn e Maul riskiern. „Wannde däsmool net bei Zeit haamkimmschd“, hotse am vorige Mittwoch zu ehrm Mann gesoat, „sollschde mool sähe, woases gitt, du Lumbes, du aafelliger! Glaabschde velleicht ich deet zu allem ja un Amen soae? Wannde däsmool net Punkt zäiene dehaam bischd, soa ichs em Härr Parrer, veschdanne! Der soll der mool richdig de Kimmel schloime. Sou, jetz waaschde Bescheid!“

De Baschdian hot seiner Chrischdien in die Hand noi veschbräche misse, dass er hoind Oowend pinktlich dehaam weer. Freilich horrer sich vorm Wäkgäih vegewissert, daß die Guggusuhr, wuu soi Fraa als Sdawazzwäldern mit in die Eh gehroachd gehadde hot, schdäih geblewwe woar. Däs hot soim Vorsatz en klaane Riß gäwwe.

In de Wätschaft honen schunn e Koroona vun luschiedige Brierer zum iebliche Schkaat erwadd. Noach dem Schkaad hot mer noch beisamme gehockt un Vezählches geschbeelt. Doodriwwer isses zwaa Uhr worrn. Dem Baschdian is die Rei kumme. „Himmel noch emool, horer zu soine Kumbaane gesoat, „ich waaß schunn, heit setzts woas oab! --- Moiner Oalde häwwich veschbräche misse, daß ich hoind Oowend schunn um zäiene dehaam weer, un jetz isses schunn zwaa vebei. Gott sei Dank is moi Guggusuhr dehaam schdäih blewwe. Awwer moi Oaldi leßt sich net so leicht ande Noas rumfiehrn. Däs is kaa Dummi, veschdanne, die is gewärfelt. Ich waaß wäiklich noch net, wie ich dem Krach ausem Wää gäih soll. Hoffentlich schleeftse, wann ich haam kumm.“ „Du bischd en oalde Schoure!“ hot sein Froind, de Uhrmachermoaschder Uuruh gelacht. „Wannse schleeft, konnschde doiner Chrischdien joo goar net beweise, daß de zor Zeit haamkumme bischd. Du muschde wecke, dasses aa glaawe dutt!“ — „Um Gottes Wille!“, hot de Baschdian gesoat, „aa noch wecke? Ich waaß wäiklich net, wiede däs maanschd.“ Doo horren sein Froind bei Seit genumme un horrem äbbes ins Ouhr gepischbert. Un am Baschdian soim Gesicht hat mer mäike kenne, dass er wirrer zuvesichtlicher in die Wält geguggd hot. Im Gäjedaal, es horrem jetz goar net mäih sou brässiert. Er hat sich noch emool hiegehockt un en Schobbe Neie beschdellt.

Um drei Uhr is alles uffgebroche un de Baschdian hot sich aa uffde Wää gemoacht. Wie e haam kumme is, hat soi Fraa im diefe Schloaf geläje un hot geschnarschd, daß mers schunn uffde Gaß gehäijert hat. De Baschdian hot sich die Schdää nuffgeschleche, hot leis die Schduwwedeer uffgemoacht un sich vorm Bett vun soiner Fraa hieposchdiert. Dann horrer, sou laut wie er gekennt hot, zäie mool „Guggug“ gemoacht. Bei dene Gugguschleeg hot soi Fraa sich langsam gereegt un hot mit ehre Aage geblinzelt. Dann isse ganz wach worrn und hot ehrn Baschdian vkleert ougeguggt. „Sieschde Baschdian, sou gefellschde raer“, hot se noch ganz benumme zu ehrm Gutedel gesoat: „Im Halbschloof häwwich de Guggug zäie mool schloage heern. Wanns immer sou bleiwe dutt, loowich mers. Es gäiht doch nix iwweren Mann, där wuu bei Zeit dehaam is!“ —

De Jaggobb woar schun als Schulbuu en Hauptkärl. Iwwer dem soi Oifäll hott mer sich kaputt loche kenne. Die Lehrer häwwe ehrn Schaff gehadde, dass mirrem zeräächd kumme sinn. Dumm woar där net, em Gäjedaal. Er woar en richdige Piffigus, wie mer sou seschd un mit alle Hunde gehetzt. Awwer faul woarer, faul, sou äbbes schdellt mer sich net vor. En gräißere

Faulwammes hot mer sich net denke kenne. Doodebei horrer alle meegliche Lumbeschdraasch im Kobb gehadde. E Poar devuu will ich Eich es neechschde Mool zum beschde gäwwe.

Neilich häwwich wirrer mool ande Jaggobb, wie er noch klaa woar, denke misse. In Bensem hots doomools e klaa Kolonialwoareläädle gäwwe, wuu soi Modder als ehr Sache oikaafe is gange. Aneme schäine Doa is es Jaggebbl dort erschiene un hot glei beim Noigäih geruufe: „Woas koschd dann bei Eich e Kilo Kaffee?“ — „Däs is ganz unnerschiedlich“, hot die Fraa gesoat, där wuu däs Geschäft gehäjert hot. „Mer häwwe Kaffee vun zwaa bis sechs Maik es Kilo.“ — „Woas koschd dann vun dem for vier Maik es halwe Värde?“ — „Fünfzwanzig Penning“, horrer zor Antwort kriecht. — „Nodiernse däs emool! Woas koschd en Zentner Reis?“ — „Ei Jaggebbl, woas widde dann mirreme ganze Zentner Reis oufange?“, hot die Fraa gelacht. — „Goar nix“, hot es Jaggebbl mitgelacht, „mer wärd awwer doch mool fieje därfe!“ — „Du hoschd ganz Räächd“, hot die Fraa gesoat, „es Freje koschd nix. En Zentner Reis koschd vun dem, wuu mer häwwe, finfunddreißig Maik.“ — „Däs schdimmt, finfunddreißig Maik häwwig aa gesoat kriecht. Ich glaab awwer, moi Modder will doodevuu nur e halb Pund. Woas deet dann däs koschde?“ „Genaa gerächend moacht däs siwwezäi unen halwe Penning.“ — „Nodiernse däs dezuu. — Wie veel mißt moi Modder foren Dobbeltzentner Mähl bezoahle, wannse den bei Ihne kaafe deet?“ —

„Oachtzwanzig Maik, du Noaseweis! Doi Modder ward awwer net glei en Dobbeltzentner wolle!“ — „Däs groad net, awwer anerhalb Pund. Däs kennese aa dezuu schreiwe. Woas meschd dann däs?“ — „Aanzwanzig Penning!“ — „Gut, un jetz kommt de Zogger drou. Wieviel koschd doo de Zentner? Gäll, noinundreißig Maik?“ — Die Fraa hat de Kobb geschillt un hot gesoat: „Du waaschd awwer Bescheid. Warum froagschde dann?“ — „Ei, weil ich wisse meeched, woas doo zwaa une värde Pund koschde.“ „Siwweunnoinzig unen halbe Penning, wanndes genaa wisse willschd.“ „Woas koschd däs alles zamme?“ Die Fraa hot alles zammegezählt un hot däs Babier em Jaggebbl gewesse. „Sieschde, Jaggebbl, däs moacht groad aa Maik un sächzig Penning!“ — „Es stimmt!“, hat der Klaane gesoat, Ziehse glei de Skondo vun zwaa Prozent oab. — Den Zeddel kennese mer jetz gäwwe, den brauch ich for moi Modder. Die Sache konnse schbeerer sälschd oabhalle.“ — „Jaggebbl“, hot die Fraa gesoat, „Dich kommer awwer schicke. Gäll, du willschd schbeerer mool Kaufmann wärm?“ — De Jaggobb hot den Zeddel schnäll vunde Teek genumme un hot im Nauswitsche geruufe: „Naa, naa! Wissee, däs is moi Rächenuffgaab for moje frieh!“